

1458

111

方舟集



膳錄監生臣黃維

膳錄監生臣范重榮

欽定四庫全書

方舟集卷十九

宋 李石 撰

周易十例畧

春秋有例者起於杜預易有例者起於王弼二
例之作以吾夫子立一定之論如乾坤二卦則
諸卦之倡謹始之例也後之學者因而例之故
作十例畧

无咎者有咎而卒於无咎也乾之九三曰君子終日乾

乾夕惕若厲无咎者剛失中道為亢之漸坤之六四括
囊无咎者陰進薄陽臣強侵主下卦之上括囊以幸免
孔子繫之曰无咎者善補過過而補之可免於咎矣易
文言无咎者九十九爻而何咎者三何咎者本自无咎
而猶畏之无大咎者未能無過何咎者徒自憂於咎一
以乾坤為例作无咎例

利有攸往者可以往而往不冒險而往也始於乾之利
見大人猶曰可往見矣坤之繇曰君子有攸往者先昧

所向後有所歸猶曰可以往矣乾坤為例利有攸往之
卦十一繇言其八爻言其三繇言有攸往者一爻言有
攸往者三繇言小利有攸往者一繇言勿用有攸往者
一爻言勿用有攸往者一繇言無攸利者二爻言無攸
利者八無不利者十二卦十三爻槩之以不冒險為利
也乾之彖曰乾始能以美利利天下不言所利大矣哉
有利不言蓋無適不利也他卦爻之利不利勿用有所
待者倣此作利有攸往例

孚者信也始於需之有孚而訟之有孚次之需者疑也
因疑而待其信可以無疑訟者爭也因爭而求其信可
以止訟或曰去就從違信不信之決也需訟之外繇言
孚者三爻言有孚者十三卦十八爻繇因事言孚者三
爻言孚者九卦十一爻爻言匪孚者一言罔孚者一其
曰中孚者信之由中而豚魚細物亦被其賜凡信之有
疑有爭者莫不釋然於此謹信之始起於需訟作孚

例

悔吝者君子求免於世之憂患一本於正心誠意慮而後動迫而後應俾不由於悔吝之塗乃已然時有不免者一身萬物隨時所值因易自忘可也繫辭曰憂悔吝者存乎介介者微小尚可以追惟之竊嘗考悔吝為二道則悔大吝小也吝尚可追惟而悔有不及者亢龍有悔此治亂休戚天下所繫孰有大於此者哉若夫屯鹿之不得往則取吝蒙以刑為發往則取吝屯蒙二吝吝乃非悔之比大小隨卦爻所寓不可一概且以乾之

悔況之豫蠱困之悔誠有間矣若乃革之悔亡則以湯武革命幾於繫天下事甚大如乾之悔也他言悔十五卦十八爻無悔無祇悔七卦八爻言悔二卦二爻言吝者自屯蒙而下十七卦十八爻小吝者二卦二爻曰小者尚有大於此者乎貞吝四卦四爻吝無咎者四卦四爻此悔吝之別君子所以自忘於憂患者如此而有大小者以乾與屯蒙為謹始作悔吝例

厲者君子以人心自危而日進乎道心之微惴惴自畏

未嘗一日不以憂患自警也乾以惕為厲訟以貞為厲
皆厲也孔子於乾以危為辭獨於艮之九三曰艮其限
列其夤厲薰心夤心之上下憂患有所限止文王之
辭也孔子釋之曰危薰心者人心道心危微之兩間正
如夤之上下也且言厲自乾以下二十三卦二十六爻
貞厲者八卦八爻厲无咎者八卦八爻厲无咎者以乾
為例貞厲者以訟為例作厲例

心情者人之有心有情也以人之有心有情見天地萬

物之無心無情情顯而易見心隱而難測君子以易洗
濯其心雖天地之大萬物之繁如對鑑妍醜無遁形矣
繫辭曰聖人以此洗心與民同患是也然此專出孔子
彖辭也言天地之心者一言天地之情者一言天地萬
物之情者三復則取其靜以自復故能以復之心見天
地之心不待觀而見之大壯則以剛大而能正不但用
壯為天地之情況其在人者至於咸之虛恒之常萃之
聚皆天地萬物共由斯路此甚易見者以我之情度

而測之也用易君子宜以復之心為心曰咸曰恒曰萃
思慮所孚可不勞矣作心情例

八象者始天地大象以求其類也類乎天者天象雲雷
風雨日月是也類乎地者地象山水泉澤木火是也并
天地為八卦十四象剛柔奇偶各以卦爻所象為類也
陰卦取天象陽卦取地象錯綜為爻變化為用文王重
易而立辭孔子立大象而釋之自其八者衍之為十四
也以說卦考之取象凡一百一十三而大象所象特一

卦一象為主而乃衍為十四坎衍其三離衍其四巽衍其一其寓諸爻者為九十九所用未如說卦之數而名物有不及象者用易之君子以意逆志斯得矣作明八象例

貞悔者鄭氏云內卦為貞外卦為悔卜筮所用也然伏羲三畫有內無外有貞無悔雖三墳八索以步氣迎日亦未見其為占筮之用抑亦文王所重以著龜所定胥變而為卜筮乎周官三易鄭氏所言蓋稽諸此也且以

伏羲為貞文王為悔內外奇偶剛柔以初為四以二為五以三為六始中終之義變化酬酢而卦之上下二體具矣其為貞悔互相應用不亦可乎占筮所用有以內為主有以外為主內變者為內主外變者為外主明取其變以為吉凶則易之神化也作貞悔例

彖卦名者卦一名名一字盡矣非聖人孰能說之如曰乾健坤順非聖人彖之則世有不能名之者八卦八名伏羲名之益以五十六名文王名之孔子又因彖之益

以六十四名其意以釋幾微幽深之義以廣二聖立言之法然皆強名也曰天地止矣又強名曰乾坤乾坤止矣而又強名以八卦乾坤之變者健順具一氣之元晝夜四時代謝摩盪命之曰易而繫之曰道故曰皆強名也揚子雲作太玄準易曰一元之統方州部家三摸九据因氣盈縮晝夜分之九九為八十一贊以御氣之變有一卦而三名之者出三聖人所作意表易道或幾乎息矣作彖卦名例

繫辭者易之詞也易之有詞自文王始繫辭爻辭均曰
詞也孔子既為彖大小象以釋文王之詞謂之繫辭者
以繫其辭所自不徒作也故曰繫辭焉以盡其言然則
辭者言之盡而有未可盡者易之意深矣嘗試分繫辭
上下未盡之意以韓康伯所注十五章上繫之章七下
繫之章八蓋隨意求盡饜飫思慮而有得焉可以合
而一之詞之統者如中孚同人至大有七釋自成至損
十一釋此可以合之為十八釋而乃分之於上下繫何

也大衍之數五十而又合之以天地之數五十有五二篇之策而為揲法矣其下又再言天地之數何也至於十三卦制器三陳九卦隔章分釋已無可疑而學者以孔子十翼之分有可疑者彖一也大象二也小象三也上繫四也下繫五也說卦六也序卦七也雜卦八也十翼幾為八翼矣得無取文王繇辭文辭二翼併足為十翼乎竊疑文王以西伯作易王為追書之王而繇辭文辭有稱王者曰王假之曰王假有廟曰王用享於西